

讀經劄記

朱鏡宙

父子合集經卷十六：「大王當知！諸根如幻，境界如夢，一切諸法，皆悉空寂，此名空解脫門。空無空相，名無相解脫門。若無有相，即無願求，名無願解脫門。如是三法，與空共行，涅槃先道。當如是擊」。釋三解脫義，言簡義賅，最為明晰。

父子合集經卷二十：「大王！何謂佛法？一切諸法，皆是佛法。時淨飯王聞是說已，自言：世尊！若一切法皆佛法者，一切眾生，皆應是佛。佛言：大王！眾生不住顛倒見者，即是佛也。大王！所言佛者。或名真如。或名實際。或名法界。但依俗諦推求詮表。非勝義諦作是說也。眾生不起顛倒不別之想，即便是佛。佛與眾生，皆由俗諦安立。以勝義諦中。一切平等故。

父子合集經卷二十：「大王！色離自性。非已有，非現有，非當有。受、想、行、識，離彼自性；三世不有，亦復如是。大王！譬如谷響。非已有，非現有，非當有；色乃至識，三世不有，亦復如是。大王！譬如陽焰。非已有，非現有，非當有；色乃至識，三世不有，亦復如是。大王！譬如聚沫。非已有，非現有，非當有；色乃至識，三世不有，亦復如是。大王！譬如石女。夢已生子，非已有，非當有，非現有；色乃至識，三世不有，亦復如是。大王！虛空無依，色乃至識，亦無所依。大王！色無有生；乃至識亦無生。大王！色無有滅；乃至識亦無滅。大王！涅槃界無生滅；色乃至識，亦無生滅。大王！法界無生滅；色乃至識，亦無生滅。大王！此法乃是如來所行，不可思議微妙境界。非取，非捨，非得，非失，非諸聲聞，及辟支佛，凡夫異生之所能及。何以故？大王！一切諸法，本無自性，若取，若捨，皆不可得；王於此法，好自安意」。五蘊無自性，故亦無生滅。既無生滅，安有三世之可言哉。

入法界體性經：「文殊師利言：世尊！一切法無所有，但有名字言說。諸法無此無彼，皆無所有。此彼無所有者，即是如。若是如者，則是真實。若是實者，彼則是菩提。」金剛經云：「如來者，即諸法如義。如即是真實，即是菩提，亦即是如來之義故。維摩詰經卷上菩薩品：一切眾生皆如也。一切法亦如也。衆賢聖亦如也。至於彌勒亦如也。如之義大矣哉！」

郁迦羅越問菩薩行經：「居家菩薩，入佛寺精舍，當住門外，至心作禮，然後當入精舍。當作是念言：「是為空寺，無境界，無有相，無有願；為慈、悲、喜、護、居寺。為得平等所居」。自念言：「我何時當得如是居寺；出塵垢之居，在是居。得十五日會說戒當新。當念起沙門意；無有菩薩，在居家得最正覺者。皆出家入山，閑居巖處，得佛道」。今人言大乘佛法，不必出家遠離，並舉世尊累劫菩薩行為證，言之亦自成理。然世尊最後成佛，還是離家入山，苦思六年，方成佛道。「無有菩薩，在居家得最正覺者」金口所宣，足以解世人之惑。

善住意天子所問經卷下：「天子！戒依信住。如是一切菩提分法，以依戒故，生長具足。天子！如是過去未來現在諸佛世尊，一切聲聞，以正受戒。是故證得三解脫門。一切戲論，皆悉除滅」。戒依信住。三解脫由戒得證。信為功德母，能長出世財。觀此益信。

如幻三摩地無量印法門經卷下：「善男子！當知西方無量光如來壽命無量，極不可計，假使俱胝那由多百千劫中，亦復不能說其邊際。其佛法住世，八萬四千那由多劫。佛涅槃後，以諸眾生善根力故，亦得值遇餘佛出世。而諸菩薩，安住念佛三昧，常得見佛，中無間缺。善男子！又復無量光如來涅槃之後，其說法處，七寶莊嚴，妙蓮法樹，自然演出微妙法音，經於一夜至明旦。時觀自在菩薩摩訶薩，即於衆寶莊嚴菩提樹下，安處其座，成等正覺。成正覺已，號普明高顯吉祥峯王如來。其佛壽命九十六俱胝那由多百千劫。正法住世，六十俱胝劫。大勢至菩薩摩訶薩於彼法中，隨佛壽量，住世久近，承事供養。乃至彼佛入涅槃後，奉持佛法，令法久住。至於最後法欲滅時，大勢至菩薩，於其剎中。得成阿耨多羅三藐三菩提果」。觀音，勢至，相繼為極樂教主，於此經見之。

朱鏡宙 本 文 作 者 宇老居士 浙江人 曾任杭州天鐘報社社長，上海民信報社社長，北京民報社社長，星嘉坡國民日報編輯或主筆；福建中國銀行副經理，上海市銀行經理，國民革命軍海陸空總司令部軍需處處長，國民革命軍第二十六軍經理處處長，甘肅省政府委員兼財政廳長，陝西省政府委員兼財政廳長，財政部川康區稅務局長，行政院設計委員會等職。

